

ՀՀ ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 56/1

22 դեկտեմբերի 2015 թ.

Քննարկվեց Ա/Ձ էմիլ Մինասյանի 25.11.2015 թ-ի բողոքը ՀՀ ՖՆ իրավաբանական վարչության պետի 14.10.2015 թ-ի թիվ 1154/02 որոշման դեմ:

Ա/Ձ էմիլ Մինասյանի բողոքում բերված փաստարկները.

Էմիլ Մինասյանը հայտնում է, որ 2010 թ-ի մարտի 12-ին գրանցվել է որպես անհատ ձեռներեց 01Ա149881: Ապրիլից մինչև 15 սեպտեմբեր 2010 թ-ն իրականացրել է հաստատագրված վճարով հարկվող ավտոտեխսպասարկման գործունեություն Մաշտոցի 5/8 հասցեում:

15 սեպտեմբեր 2010 թ-ին Սպանդարյանի հարկային տեսչություն է ներկայացվել դիմում-հայտարարություն գործունեությունը ժամանակավորապես դադարեցնելու մասին և դրանից հետո գործունեություն չի իրականացրել:

19 նոյեմբեր 2015 թ-ին ՀՀ ֆինանսների նախարարությունից ստացվել է թիվ 1154/02 որոշումը, որի համաձայն Ա/Ձ էմիլ Մինասյանի չկատարված հարկային պարտավորությունները կազմում են 259.383 դրամ, որից սոցիալական ապահովության վճարի գծով 221.240 դրամ, այդ թվում՝ ապառք 139.840 դրամ, տույժ 81.440 դրամ, որն առաջացել է 2010 թ-ի 12-րդ, 2011 թ-ի 1-12-րդ, 2012 թ-ի 1-12-րդ ամսեկան հաշվարկներով, ինչպես նաև հաստատագրված վճարի գծով պարտավորություն 38.143 դրամ, այդ թվում՝ ապառք 16.400 դրամ, տույժ 21.743 դրամ, որն առաջացել է հունիս-նոյեմբեր ամիսների ներկայացրած հաշվարկներով:

Ա/Ձ էմիլ Մինասյանը հայտնում է նաև, որ 15 սեպտեմբեր 2010 թ-ից դադարեցրել է գործունեությունը և ընդհանրապես գործունեություն չի իրականացրել և այդ մասին գրավոր տեղյակ է պահել նաև հարկային տեսչությանը:

Ելնելով վերոգրյալից՝ Ա/Ձ էմիլ Մինասյանը խնդրում է աջակցել վերոգրյալ գանձման որոշմամբ առաջադրված պարտավորությունները վերանայելու հարցում:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննարկելով Ա/Ձ էմիլ Մինասյանի վերաբերյալ վարչական վարույթի նյութերը պարզել է, որ 12.10.2015 թ-ի դրությամբ նրա չկատարված հարկային պարտավորությունները կազմում են 259.383 դրամ: Հաստատագրված վճարի գծով պարտավորությունը կազմում է 38.143 դրամ, որն առաջացել է 2010 թ-ի հունիս-նոյեմբեր ամիսների համար ներկայացված հաշվարկներով: Սոցիալական ապահովության վճարի գծով պարտավորությունը կազմում է 221.240 դրամ, որն առաջացել է 2010 թ-ի 12-րդ, 2011 թ-ի 1-12-րդ, 2012 թ-ի 1-12-րդ ամսեկան հաշվարկներով:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ՖՆ իրավաբանական վարչության պետի կողմից 14.10.2015 թ-ին ընդունվել է թիվ 1154/02 որոշումը (այսուհետ նաև Որոշում) Ա/Ձ էմիլ Մինասյանից 259.383 դրամ պարտավորության գումար գանձելու մասին:

Քննարկման ընթացքում պարզվեց, որ Ա/Ձ էմիլ Մինասյանը 2010 թ-ի ընթացքում իրականացրել է հաստատագրված վճարով հարկվող ավտոտեխսպասարկման գործունեություն և Որոշման մեջ հաստատագրված վճարի գծով նշված պարտավորությունը՝ գումարով 38.143 դրամ, առաջացել է 2010 թ-ի հունիս-նոյեմբեր ամիսների համար ներկայացված հաշվարկներով:

Ինչ վերաբերվում է սոցիալական ապահովության վճարի գծով գանձման առաջադրված պարտավորությանը, ապա այն առաջացել է նվազագույն սոցիալական ապահովության վճարի գումարները սահմանված ժամկետներում չվճարելու հետևանքով: Մասնավորապես, չնայած նրան, որ Ա/Ձ էմիլ Մինասյանի կողմից 15.09.2010 թ-ին Սպանդարյանի հարկային տեսչություն է ներկայացվել դիմում-հայտարարություն գործունեությունը ժամանակավորապես դադարեցնելու մասին, սակայն հաշվի առնելով այն հանգամանքը, որ նրա կողմից հարկային տեսչություն չի հանձնվել պետական գրանցման վկայականը, 2010 թ-ի դեկտեմբերից մինչև 2012 թ-ի դեկտեմբեր ամիսն ընկած ժամանակահատվածի համար հաշվարկվել են նվազագույն սոցիալական ապահովության վճարի գումարներ:

Այս կապակցությամբ հարկ է նշել, որ մինչև 31.12.2012 թ-ը գործող «Պարտադիր սոցիալական ապահովության վճարների մասին» ՀՀ օրենքի 5-րդ հոդվածի 5-րդ մասի համաձայն, անհատ ձեռնարկատերերը պարտավոր են յուրաքանչյուր ամսվա համար վճարել նվազագույն սոցիալական վճար՝ 5000 դրամի չափով, մինչև հաջորդ ամսվա 15-ը: Ընդ որում՝ պետական գրանցման վկայականը ժամանակավոր հարկային մարմին հանձնած (մինչև 25.07.2012 թ-ը) և այդ ժամանակահատվածում ձեռնարկատիրական գործունեություն չիրականացրած անհատ ձեռնարկատերը նվազագույն սոցիալական վճարներ չի կատարում՝ վկայականը հանձնելուն հաջորդող ամսվանից մինչև վկայականը հետ ստանալու ամիսն ընկած ժամանակահատվածի համար:

Դա նշանակում է, որ անհատ ձեռնարկատիրոջ կողմից պետական գրանցման վկայականը ժամանակավորապես հարկային մարմին հանձնած չլինելու դեպքում անհատ ձեռնարկատերը պարտավոր էր վճարել 5000 դրամ նվազագույն սոցիալական վճար՝ անկախ ձեռնարկատիրական գործունեություն իրականացնելու կամ չիրականացնելու հանգամանքից:

Քննարկվող դեպքում Ա/Ձ էմիլ Մինասյանի կողմից պետական գրանցման վկայականը ժամանակավորապես հարկային մարմին չի հանձնվել, ինչը և հիմք է հանդիսացել նվազագույն սոցիալական վճարի գծով պարտավորությունների հաշվարկման համար:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

ՀՀ ՖՆ իրավաբանական վարչության պետի 14.10.2015 թ-ի թիվ 1154/02 որոշումը թողնել անփոփոխ, իսկ բողոքը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝


 **Վ.ՄԻՐՈՒՄՅԱՆ**